

TIMOR-LESTE NIA KONSILIASAUN HO AUSTRÁLIA KONA-BA FRONTEIRAS MARÍTIMAS

Iha 11 Abril 2016, Governu Timor-Leste hahú konsiliaun kompulsoria tuir Nasoens Unidas nia Konvensaun ba Lei Tasi (**UNCLOS**) ho objetivu atu hetan akordu ida kona-ba fronteiras marítimas permanentes ho Austrália.

Saida mak konsiliaun kompulsoria?

Konsiliaun kompulsoria mak prosesu ida tuir UNCLOS (Aneksu V, Seksaun 2) ne'ebé konsiliador sira husi painel ida sei ajuda Estadu sira ne'ebé envolve hodi koko buka hetan solusaun amigável ida ba sira nia disputa.

Prosesu ida ne'e bele uza ba iha sirkumstânsia hirak ne'ebé seidak iha akordu entre Estadu viziñu sira no bainhira Estadu ida halo ona deklarasaun hodi esklui husi jurisdisaun ba orgaun obrigatória hodi rezolve disputa kona-ba fronteiras marítimas, hanesan Austrália halo tiha ona. Konsiliaun kompulsoria bele ajuda Estadu ida hanesan Timor-Leste koko atu rezolve disputa fronteira marítima ida bainhira nia la iha opsau seluk tan.

Konsiliaun ne'e painel ida ho konsiliador independente nain lima mak sei hala'o nudar komisaun konsiliaun. Komisaun ne'e sei buka atu komprende faktu no pozisaun legal husi Estadu idak-idak nian.

Se Austrália ho Timor-Leste la bele hetan akordu ida, komisaun konsiliaun ne'e sei fornese relatóriu ida ba Sekretáriu Jeral Nasoens Unidas nian ho rekomendasaun sira hodi tulun atu hetan rezolusaun. Austrália no Timor-Leste sei iha obrigasaun hodi negosia ho boa fé bazeia ba komisaun nia relatóriu.

Tanba sa mak Timor-Leste hili konsiliaun kompulsoria?

Konsiliaun kompulsoria mak agora dadaun hanesan dalan úniku ne'ebé disponível ba Timor-Leste hodi lori Austrália ba negosiasaun ba fronteiras marítimas permanentes. Ida ne'e tanba:

1. Iha Marsu 2002, fulan rua molok Timor-Leste nia restaurasaun ba nia independênsia, Austrália hasees-aan husi prosesu obrigatóriu hodi rezolve disputa relasiona ho

fronteiras marítimas tuir UNCLOS no Tribunal Internasional ba Justisa. Ida ne'e esklui possibilidade ba tribunal internacional ida hodi desidi fronteiras marítimas entre Timor-Leste no Austrália; no

2. Austrália rekuza atu negosia fronteiras marítimas bilateralmente.

Fronteiras marítimas mak kestaun soberania ba povu Timor-Leste. Governu Timor-Leste sei konsidera opsau hotu-hotu hodi atinji nia direitu tuir lei internacional.

Saida mak akontese agora?

Timor-Leste informa ona Austrália kona-ba konsiliaun kompulsoria iha 11 Abril 2016 no hili tiha ona konsiliador nain rua. Timor-Leste propoen tiha ona katak Tribunal Permanente ba Arbitrajen (PCA) mak administra konsiliaun ne'e.

Austrália agora iha oportunidade atu hili konsiliador nain rua. Konsiliador nain haat ne'ebé Estadu nomeia sei hili presidente ida molok prosesu ne'e hahú.

Oinsa ho Indonézia?

Konsiliaun ne'e haree ba disputa entre Timor-Leste no Austrália nian deit.

Timor-Leste nia viziñu marítima seluk, Indonézia, konkorda tiha ona atu negosia fronteiras marítimas bilateralmente ho Timor-Leste tuir lei internacional, liu-liu UNCLOS.

Timor-Leste hahú konsiliaun kompulsoria; notífika Austrália

Forma Komisaun Konsiliaun no desidi nia prosedimentu

Konsiliaun - estadu sira ne'ebé envolve halo submisaun no tuir audiênsia

komisaun halo rekomendasaun iha sira nia relatóriu

Estadu ne'ebé envolve tenki negosia ho boa fé



FIXA
INFORMASAUN
2016

Aprende tan @ www.gfm.tl ka kontaktu:
Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Governu Demokrátika Repúblika Timor-Leste
e: info@gfm.tl tel: +670 7742 5544



Gabinete
Fronteiras
Marítimas